

2CO - Tolish Bible

2 KORİNFIJON

Pauli bə Korinfijon Diminə Nomə

2 Korinfijon

2Kor.

PAULİ

BƏ KORİNFIJON DIMİNƏ NOMƏ

VƏSƏ

Pauli «*Bə Korinfijon Diminə Nomə*» çəy de Korinfi imoniyon icmo çətinə mınosibəton bıə vaxtədə nıvıştə bıə. Çe icmo kali uzvon Pauli ciddi ittıhom kardeydəbin, əmma əv bo aştı bey dilisıxtə cəhd kardeydəbe. İmoniyon arədə bıə ın mınosibəton de pəşimonəti iyən aştı həll beədə əv vey şo be. Çəyo əy icmoku xahiş kardışe ki, bə Yəhudəyədə bıə imoniyon maddiyə koməq bıkən. Oxonə semononədə Paul ıştə həvariyə xıdməti mıdofıə kardeydə, çumçiko Korinfədə kali odəmon ıştəni həğiği həvari elon kardəbin, Pauli de gəlpə həvari bey ittıhom kardeydəbin.

Kitobi məzmun:

1:1-11 Vəsə

1:12–7:16 Paul iyən Korinfədə bıə icmo

8:1–9:15 Bo Yəhudəyə icmo ianon

10:1–12:21 Paul ıştəni mıdofıə kardeydə

13:1-13 Məslohaton iyən səlomon

1

¹*De Xıdo rizo çe Məsih İsa həvari bıə az Pauliku iyən çəmə imoniyə boə Timoteyku səlom bıbu Korinfədə bıə bə Xıdo icmo iyən Axayyə viloyətədə bıə bə Xıdo xəlği həmməy! ²Çəmə Pıə Xıdoku iyən Rəbb İsa Məsihiku lutf iyən sulh bıbu bəşmə!

Dılvandi səvon bıə Xıdo

³Şukur bıbu bəçəmə Rəbb İsa Məsihi Pıə Xıdo! Əv hejo mərhəmətinə Pıəy iyən har curə dılvandi doə Xıdoyə. ⁴Çəmə kəşə har əzyətədə Əv bəmə dılvandi doydə ki, əmənən de Xıdoku sə dılvandi bə har curə əzyət kəşəkəson dılvandi doy bızınəmon. ⁵Oxo bə Məsihi xoto çanə vey əzob kəşeydəmonbo, de Məsihi vositə anə vey dılvandi səydəmon. ⁶Əzyət kəşeydəmonbo, ım şımə dılvandi iyən xılosiroyə. Dılvandi səydəmonbo, ımən boşmə dılvandi səyroyə ki, şımənən bənə əmə bə əzobon tov varde

*1:1 Həv.18:1

bızınən. ⁷ Əmə bəşmə ğoym umu bastəmone, çumçiko zıneydəmon ki, şımə bəçəmə əzobon xanboz bey ğəzinə, bəçəmə dılvandiyən xanbozişon.

⁸ *Ha çımı imoniyə boon, piyeydəmni şımə bexəbə bībən Asiyə viloyətədə çəmə kəşə əzyətonku. Əmə iştə zu nıvıŝkiyə qıləy şələ jiyədə mandimon. Hətto umu nıbemone ki, bəyji bəmandemon. ⁹ İştə dılətono hiss kardımone ki, bə marde məhkum bıəmon. Bı səbəb ım bəçəmə sə oməy ki, əmə bəştə ne, bə mardon bəyji kardə Xıdo peştıpurimon. ¹⁰ Xıdo peroxnişe əməni çe marde yolə təhlükəku ijən pebəroxne. Əmə Bəy umudəvomon ki, ¹¹ deşmə kardə dıvon Əv bəmə koməq karde-karde əməni pebəroxne. De jıqoy vey odəmon kardə dıvo səkiştədə bəmə doə bıə ənomiro bıdə vey kəson boəmə bə Xıdo şukur bıkən.

Pauli bə di dəqmiyə səyohət

¹² Çəmə vicdonən şoyde ki, bı dınyoədə, bəşmə mınosibətədə de bəşəri mudrikəti ne, de Xıdo lutfi, Xıdoku omə de pokə dıləti iyən səmimiyəti jiyəmon iyən bı səbəb fəxr kardeydəmon. ¹³ Əmə jıçiy nıvıŝteydənimon ki, şımə handeədə çok sənırəsən. ¹⁴ Hələ ki, sərəsəşon bə kamişəvoy. Rəbb İsa Məsihi omə rujədə çəmə fəxr şımə bey ğəzinə, şımə fəxrən əmə bəbemon. Umudəvom ki, ımı səbərəsəşon.

¹⁵ *Bımi uspur bim, sıftə şımə tonon ome piyeydəmbe ki, şımə dığat lutf bıstənən. ¹⁶ Həm bə Makedoniyə viloyət şeədə, həm Makedoniyəo oqardeədə piyəme bom şımə tonon. Çımı bəpeşt şımə mını bə Yəhudəyə dəro bıkən. ¹⁷ Az bı ğəror omeədə beağıləti kardimebu? Yaanki çımı ğəroron cismoniyə təbiətiku omeydən ki, qah «bəle, bəle», qah «xəyr, xəyr» bıvotım? ¹⁸ Bə Xıdo etiboynəti peştıpur bey bəbe ki, çımı bəşmə rosniyə sıxan qah «bəle», qah «xəyr» ni. ¹⁹ *Az de Sila iyən Timotey bə ico bəşmə vəz kardə bıə Xıdo Zoə İsa Məsih həm «bəle», həmən «xəyr» ni. Əncəx «bəle» heste Bəvədə. ²⁰ Oxo Xıdo doə vədon həmməy İsa Məsihədə «bəle»yin. Bı səbəb bo Xıdo izzəti de Məsihi vositə «Amin» voteydəmon. ²¹ Əməni deşmə ivirədə de Məsihi ğoym bastə iyən əməni məsh bıkə Xıdoye. ²² Əy mihi jəşe bəmə iyən İştə Rufi qırov noşe çəmə dilonədə.

²³ Xıdo şoyde, bəçımı con ğəssəm detosə esə əve bə Korinf noməym ki, bəbolim oməy boşmə. ²⁴ Bə səbəb ne ki, əmə əğəti karde piyeydəmone bəşmə imoni, boşmə şo beyro deşmə əməqdoşimon. Oxo şımə imonədə həkəm mandəşon.

2

Pauli bə Korinfi imoniyon çokə mınosibət

¹ Əve az bə ğəror oməym ki, ijən nıvom şımə tonon şıməni dılhor nıkəm. ² Çumçiko şıməni dılhor bıkom, ğərayz dılhor kardə bıə şıməhon ki mını şo bəka? ³ Az ımı bəşmə nıvıŝtəmbe ki, şımə tonon omeədə mını şo kardənin bıə odəmon mını dılhor

*1:8 1Kor.15:32

*1:15-16 Həv.19:21

*1:19 Həv.18:5

nıken. Umudəvom ki, çımı şoy-şoy şımə har qıləyni şoy-şoye. ⁴ Bo dilhor karde ne, bəşmə bastə mehıbbəti bo sərəseyro de yolə əzyəti, dilədoji iyən çəşə arson dilədə nıvıştıme bəşmə.

Qınokori baxşey

⁵ Qirəm i kəsi dilhorəti vardəşəbo, piyeydəmni mıbolıgə bıkəm, əncəx bəmi ne, mıəyyən gədər bəşmə həmməy dilhorəti vardəşe. ⁶ Şıməhon veyni doə cəzo vəse bı jıləvoni. ⁷ Çok bəbe əy bıbaxşən iyən dılvandı bıdən ki, bıdə həddisə vey dilhorəti nıbu. ⁸ Bı səbəb şıməku əjo kardəm ki, ijənən mehıbbət nişo bıkən bəy. ⁹ Sıftə bəşmə nıvıştəmbe ki, har vəzyətədə şımə itoətin bey osə bıkəm. ¹⁰ Şımə bıbaxşon harki, azən bəbaxşem əy. Qirəm az jıçiy baxşimesə, bəşmə xoto Məsihi huzurədə baxşıme ki, ¹¹ bə Şəytoni fırsənd mədəmon. Çumçiko çəy niyətonku bexəbə nimon.

¹²*De Məsihi Şoyə Xəbə pevılo karde məğsədi az bə Troas viloyəti omeədə Rəbbi kəybə okardışe bomı. ¹³ Əmma ıştə imoniyə boə Titi əyo nıvindeədə çımı dil norohat be. Əve ki vıdo kardıme de əyo bıəkəson, oməym bə Makedoniyə viloyət.

Əmə bə Xıdo xoş omə Məsihi xoşbumon

¹⁴ Əməni hejo Məsihi gələbə təntənədə bardə, Çəy zıney xoşbuy deçəmə vositə bə har tərəfi pevılo kardə bə Xıdo şukur bıbu! ¹⁵ Çumçiko əmə həm xılos, həməən həlok bıəkəson dilədə bə Xıdo xoş omə Məsihi xoşbumon. ¹⁶ Əmə bo həlok bıəkəson bə marde bardə marde bumon, bo xılos bıəkəson isə bə jimon bardə jimoni xoşbumon. Ki bı jıqo koy bəvəc bome?! ¹⁷ Oxo əmə bənə vey kəson Xıdo kələmi həvateydənimon, bərəks, Xıdo tərəfo vıgəndə bıə, Xıdo huzurədə, bə Məsihi məxsus be-be de gısdogəti voteydəmon.

3

Bəmə gəbıliyət bıdə Xıdoye

¹ ıştə barədə ijənən zəmonət doydəmonbu? Bənə kali kəson bəşmə, yaan şıməku zəmonət doə bə nomon ehtiyoci hestımone? ² Çəmə nomon şımənişon ki, bo həmə insonon hande iyən sərəseyro bəçəmə dilon nıvıştə bıəşon. ³*Oşko çiyeydə ki, çəmə xıdməti səkiştədə şımə Məsihi noməşon. In nomə de mırəkkəbi ne, de Hest Bıə Xıdo Rufi bə sıgə lohə ne, bə insonon dili lohə nıvıştə bıə. ⁴ Əmə Məsihi hımhımbədə bə Xıdo jıqo peştıpurimon. ⁵ Çəmə ıştənıku nimone jıqıləy gəbıliyət iyən ımı iddo karde zıneydənimon. Bəmə gəbıliyət bıdə Xıdoye.

Tojə Əhdi ehtışom

⁶*Bo Tojə Əhdi xıdmətəvonon beyro Əy gəbıliyətın kardışe əməni. In Tojə Əhd bə nıvıştə bıə Ğanuni ne, bə Rufi əsosin beydə. Çumçiko Ğanuni hərfi sərəsəy kışteydə,

***2:12-13** Həv.20:1

***3:3** Beşə.24:12; Yer.31:33; Yez.11:19-20; 36:26

***3:6** Yer.31:31

Ruf isə jimon doydə.

⁷*De marde bə sə qınyə xıdmət, yəni sıǵə lohə səpe həkk kardə bıə nıvıştə Ğanun de yolə ehtişomi oməy. Çe Musa dimədə şəvəx doə ın ehtişom mıvəǵǵəti be-be İsraili fərzəndon bəçəy dimi diyə karde nıznəşone. ⁸Jıqo beədə bə Rufi əsosin bıə xıdmət həniyən ehtişomin əbini bəqəm? ⁹Şayət insoni mıhokimə kardə xıdmət ehtişomin bıbo, bəvədə salehəti vardə xıdməti ehtişom çanədə veye. ¹⁰Çumçıko sıftə ehtişomin bıəy, esət de behəddə ehtişomi mıǵoyisədə həni ehtişomin ni. ¹¹Qirəm mıvəǵǵəti bıəy de ehtişomi omeybo, hejo bıəy ehtişom həniyən yole.

¹²Bı jıqo yolə umu soyb beyro əmə de yolə ciqə vote bəzınemon. ¹³*Əmə bənə Musa nimon ki, İsrailijon çəy dimədə bıə mıvəǵǵətiyə ehtişomi nıvindeyro niǵab edoşe bəştə dimi. ¹⁴İsrailijon zehinon ebastə bin. Tosə imrujnə ruji Kanə Əhd handə beədə həmonə niǵab mandeydə. In niǵab peqətə beydəni, çumçıko əv əncəx de Məsihi vositə peqətə beydə. ¹⁵Hətto tosə imrujnə ruji çe Musa Nıvıştəyon handə beyədə ın niǵab çəvon dilon edoydə. ¹⁶Əmma harki bə Rəbbi tərəf oqardeydəbo, bə vaxti niǵab peqətə beydə. ¹⁷Rəbb Rufe, Rəbbi Ruf konco bıbo, ozodəti əyoy. ¹⁸Əmə həmməy ıstə benıǵabə dimədə Rəbbi ehtişomi nişo doydəmon. Jıqoen, ın ehtişom bəmənədə ziyod be-be bə Rəbbi surəti mıvofıǵ dəqiş beydəmon. Imi Ruf bıə Rəbb kardeydə.

4

Andomədə bıə xəzinə

¹De jıqoy Xıdo deştə mərhəməti asbardəşe bəmə ın xıdmət, əve əmə rufo eqıneydənimon. ²Əmə xəcolət vardə niyoniyə koon rədd kardəmonə. Hiləbozəti kardeydənimon, Xıdo kəlomi dəqiş kardeydənimon, intasi həǵıǵəti bərmalə bəyon karde-karde Xıdo huzurədə iyən har insoni vicdoni vədə ıstə barədə zəmonət doydəmon. ³Şayət çəmə pevilo kardə Şoyə Xəbə niyoniyebu, əncəx bə həlok şəkəsonro niyoniyə. ⁴Çı dovri xıdo bıə Şaytoni əvoni korəzehin kardışe ki, çe Xıdo surət bıə Məsihi ehtişominə Şoyə Xəbə bə beimonon ruşnə səniǵandı. ⁵Əmə ıstəni ne, İsa Məsihi Rəbb bey vəz kardeydəmon. Əmma bə İsa xoto ıstəni şıməhon ğuli ğəzinə təǵdim kardeydəmon. ⁶*Çumçıko «bıdə zılmoto ruşnə dəvəşi» votə Xıdo bəçəmə dilon nur səǵandışe ki, əmə bıfaməmon Çəy ehtişominə nuri, ım İsa Məsihi dimiku dəvəteydə bəmə.

⁷İntasi əmə ın dəqərinə xəzinə qılıyə ğəbonədə, yəni ıstə andomonədə oqəteydəmon iyən nişo doydəmon ın başə ğıvə çəməku ne, Xıdoku omeydə. ⁸Hartərəfə əzyət kəşeydəmon, əmma məǵlub beydənimon. Saysimə bıəmon, intasi beumu nimon. ⁹Rımuz kardə beydəmon, əmma tərəq kardə beydənimon. Dəǵandə beydəmon, əmma məhv beydənimon. ¹⁰İstə andomədə çe İsa marde daimən kırneydəmon ki, Çəy jimon oşko bıçıyı çəmə andomədə. ¹¹Çumçıko çe İsa jimoni ıstə faniyə andomədə oşko nişo

***3:7** Beşe.34:29-30

***3:13** Beşe.34:33

***4:6** Ofə.1:3

kardeyro əmə jiyə-jiyə bə İsa xoto bə marde məhkum kardə beydəmon. ¹² De jıqoy marde bəməndə fəoliyət nişo doydə, jimon isə şımənədə.

¹³ * «İmon vardıme, bı səbəb votıme»

nıviştə bıə, əve eyni rufi imon doşe bəmə, əmənen imon vardeydəmon iyən bı səbəb vəz kardeydəmon. ¹⁴ Çumçiko zıneydəmon ki, Rəbb İsa bəyji kardə Xıdo əməniyən de İsa bə ico bəyji bəkarde, deşmə bə ivırə Bəştə huzur bebəkarde. ¹⁵ İmon həmməy boşmə kardə beydən. Jıqəən, çe Xıdo lutf vey be-be bo vey odəmi ehsan bıbu iyən Bəçəy izzətiro həniyən vey şukur kardə bıbu.

Mıvəğğəti ne, zol bıəyon vocibin

¹⁶ Əve ki əmə iştə umu qın kardənimon. Çəmə zahiri vicud şe-şe kanə bıboən, dılətono rujbəruij tojə beydəmon. ¹⁷ Çumçiko çəmə kəşə mıvəğğətiyə, sıvıkə əzyəton de hiç çiy bə mığoyisə nıomə yolə iyən zolə izzət vardeyden bəmə. ¹⁸ İştə nəzəron bə çiyəyon ne, bə nıçiyəyon səruteydəmon. Çumçiko çiyəyon mıvəğğətin, nıçiyəyon zolin.

5

Dınyovi məskən, yaan osmonədə bıə məskən

¹ Zıneydəmon ki, çəmə çay dılədə jiyə ım dınyovi çodı – yəni çəmə andom bırıjiyo, osmonədə Xıdo bəmə doə məskən, de dasti dutə nıbə qıləy zolə kə hestımone. ² Esət hələliğə norınık kardeydəmon, osmonədə bıə iştə məskəni de həsrəti bə çəşimon ki, əməni dəqəti. ³ Hətto betalo bıbomonən, deəy qucili nıbəmandemon. ⁴ Bı dınyovi çodıədə əmə həmməy qonə şələ jiyədə norınık kardeydəmon. Çumçiko iştə talo evatey ne, iştə səpe edoy piyeydəmone ki, jimon faniyə çiyon əvəz bıkə. ⁵ Məğsəd ime, Xıdo məhz bımi hozı kardəşe əməni, Əy İştə Rufi zəmonət doəşe bəmə. ⁶ Bı səbəb peştıpurimon, həmçinin zıneydəmon ki, bı andomədə çanə bımandomon, Rəbbiku diyəromon. ⁷ Əmə de imoni vositə jimon kardeydəmon, de çəşi vindəyonro ne. ⁸ Həlbətən, peştıpurimon iyən ım andomi tərqi kardey iştə Rəbbi kədə vırəbavırə bey baş qəteydəmon. ⁹ Bı səbəb andomədə bıjiyomonən, yaan andomi tərqi bıkomonən çəmə məğsəd Rəbbi rozi haştəye. ¹⁰ * Çumçiko çanədə ki bı andomədəmon çəmə kardə əməlon bevəc bıbonən, çok bıbonən çəvon əvəzi səyro əmə bə Məsihi hıkmı kursi nav beşəninimon.

Aştı karde xıdmət

¹¹ De jıqo, əmə sərəseydəmon Rəbbiku tarsey çıçe, əve dastpoçə beydəmon bə insonon bovə bıdəmon karde. Çəmə ki bey bə Xıdo oşkoye iyən umudəvom ki, bəşmə vicdoniyən oşkoye. ¹² Piyeydənimone iştə barədə bəşmə zəmonət bıdəmon. Əmma imkon doydəmon ki, deyəmə fəxr bıkən. Jıqəən, deştə dılı ne, deştə zahiri hərəkəton

* **4:13** Zəb.116:10

* **5:10** Rom.14:10

bə ğuddə kardəkəson cəvob bədoşon. ¹³ Qirəm əmə bə cuş oməmonbo, ım bo Xıdoye, ne, şayət çəmə ağıl çəmə sədəybo, ım boşməy. ¹⁴ Məsihi mehibbət əməni məcbur kardeydə iyən əmə bı jıqo fikir omeydəmon ki, İ Kəs bo həmməy marde, yəni həmməy Deçəy marde mardin. ¹⁵ Əv həmməy roədə marde ki, bıdə jiyəkəson həni boştə ne, boəvon Mardə iyən Bəyji Bıəkəsi bijiyın.

¹⁶ Çımi səkiştədə əmə həni hiç kəsi de bəşəri noxtə-nəzəri pamyeydənimon. Keynəsə Məsihi de bəşəri noxtə-nəzəri pamyəmonə, həni esət Əy jəqo pamyeydənimon. ¹⁷ De jıqo, ki de Məsihi iyebu, əv tojə ofəyemone, kanə bıəyon dəvardin-şin, tojəyon bino bin. ¹⁸ Çımon həmməy Xıdokun. Əy de Məsihi vositə əməni aştı kardışe Deştə iyən ın xıdməti bəmə doşe ki, əmə co kəsonən Deəy aştı bıkəmon. ¹⁹ De jıqoy Xıdo insonon taxsıron bəçəvon vəynə nınoşe, de Məsihi vositə dınyo Deştə aştı kardışe. Əy asbardışe bəmə aştı barədə bıə xəbə pevilo bıkəmon. ²⁰ De jıqo, əmə Məsihi nımoyəndəmon, jıqo bızın Xıdo deçəmə vositə əjo kardeydə. De Məsihi nomi lovə kardeydəmon: aştı bıbən de Xıdo. ²¹ Xıdo, de qıno əloğəş nıbə Məsihi boçəmə qınonro ğırbon doşe ki, de Məsihi vositə Xıdo salehəti bəmənədə bıbu.

6

Çətinə xıdmətədə bəfomandəti

¹ Bı səbəb əmə, de Xıdo ivirədə koəkon şıməku əjo kardeydəmon ki, Çəy lutf şımə jimonədə besəmərə nımandı. ^{2*} Çumçiko Əv voteydə:

«Mınosibə vaxtədə məsəme tını,
Xılosi ruji koməq kardıme bəti».

Iməha, esət mınosibə vaxte, ıməha, esət xılosi ruje.

³ Əmə hiç kəsi dəqijniyə çičsə kardeydənimon ki, çəmə xıdməti mızəmmət nıkən.

^{4*} Bərəks, əmə çe Xıdo xıdmətəvonimon ıştə barədə har çiyədə zəmonət doydəmon: tov vardeyədə, əzyətonədə, ehtiyocənədə, mısibətonədə. ⁵ Əməni kuyedən, həbs kardeydən, tojneydən, zəhmət kəşeydəmon, ənəhit mandeydəmon, vəşi mandeydəmon.

⁶ Əmə pokə jimonədə, zıneyədə, səbrədə, xəymandətiədə, Mığəddəsə Rufədə, həğiğiyyə mehibbətədə, ⁷ həğiğəti bəyon kardeyədə, Xıdo ğıvvədə, çəmə avjor salehətiyə, əmə deəy hıcum kardeydəmon, deəy mıdofıə beydəmon. ⁸ Əməni hurmətin iyən behurmət kardeədə, təhğir iyən tarif kardeədə əmə ıştən bəştə zomin mandeydəmon. Əməni duyəvoj zıneydən, əmma həğiğəti voteydəmon.

⁹ Noməlumimon, əmma zıneydən əməni. Iməha, çe marde çanqədəmon, əmma hələ jıyeydəmon. Cəzo kəşeydəmon, əmma kıştə beydənimon. ¹⁰ Gəhər kəşeydəmon, hejo şoy-şoy kardəmon. Əməni beçiz zıneydən, əmma vey kəson ərbob kardəmon. Hiçiy nimone, əmma bə har çiy soybimon.

¹¹ Ha Korinfijon, deşmə bərmalə qəp jəydəmon, ıştə dili boşmə okərdəmonə.

¹² Çəmə dılədə boşmə vırə veye, şımə dılədə isə bəmə vırə kame. ¹³ Çımi mığobilədə

*6:2 Yeş.49:8

*6:4-8 Həv.16:23

az ıstə fərzəndon ğəzinə ovardeydəm bəşmə, şımənən ıstə dili okən.

De beimonon bə eyri qiyəband dəməşən

¹⁴ De beimonon bə eyri qiyəband dəməşən. Çumçiko salehəti de beğanunəti çı xanbozəti hestışe? Ruşnə de toyki çoknə ivirədə be bəzine? ¹⁵ Məsihi de iblisi^a çı ittifoğ hestışe? Yaanki imoniyə odəmi de beimoni bə ico çiç hestışe? ¹⁶ *Xıdo məbədi de biton ittifoğ be bəzine? Oxo əmə Hest Bıə Xıdo məbədimon. Jıqəən, Xıdo votəşe:

«Az bəvonədə bəjiyem, deyəvon bəbem,

Az çəvon Xıdo bəbem,

Əvonən Çımı xəlğ bəben.

¹⁷ *Əve şımə beşən çəvon arəo,

co bıbən

Rəbb jıqo voteydə,

Bə nopok bıəy məqınən;

Bəvədə Az şıməni ğəbul bəkam.

¹⁸ *Az boşmə Pıə bəbem,

Şımənən Bomı zoon iyən kinon bəbeyon.

Ğudrətinə Rəbb jıqo voteydə».

7

Paul kədəri bəpeştə şo be

¹ Azizqiromiyon, Xıdo çanə vədon doəşe bəmə! Boən cismən iyən ruhən mırdol kardə çiyonku ıstəni pok bıkəmon iyən de Xıdo tarsi bə miğəddəsəti həsr bıkəmon.

² ıstə dili okən boəmə! Əmə bə hiçki nohəxəti kardəmonni, zərər jəmonni iyən istismor kardəmonni. ³ Piyeydəmni deştə sıxanon şıməni məhkum bıkəm, çumçiko sıftəku çoknə votəmbe, şımə çəmə dilədə jıqo qıləy vırə kardəyone ki, bımərdomonən, bıjiyomonən deşmə bəbemon. ⁴ Az vey uspur beydəm bəşmə, deşmə fəxr kardəm. Çanə əzob bıkəşomən, çımı dilvandi veye, şoy-şoyım behədə.

⁵ *Bə Makedoniyə omeədə cismən rohati pəydo nıkardımone. Har tərəfo əzyət kəşeydəbimon. Bentono mınəqışon, dılətono tars hestbe. ⁶ İntasi bə məzlumon dılvandi doə Xıdo de Titi ome vositə bəmənən dılvandi doşe. ⁷ Əncəx de Titi ome ne, şımə bəy doə dılvandiku əmə dılvandi səmone. Çumçiko Titi votışe ki, şımə bomı xıvət kardeydon, dard iyən ğıryət kəşeydon. Bı səbəb az həniyən vey şo bim.

⁸ Qirəm deştə nıvıştə nomə şıməni kədərini kardımebu, bımi pəşimon nim. İntasi az i ləzən bıbo deştə nomə bəşmə kədər doyro pəşimon bim. ⁹ Əmma esət bəşmə kədəri

^a**6:15** *İblis* mətnədə – Belial.

***6:16** Lev.26:12; Yez.37:27; 1Kor.3:16; 6:19; Vəhy 21:3

***6:17** Yeş.52:11; Yez.20:34,41

***6:18** 2Şəm.7:14; 1Saln.17:13; Yeş.43:5-7; Yer.31:9

***7:5** 2Kor.2:12-13

qorə ne, bı kədəri hı cubətədə şımə tobə kardeyro şo bim. De Xıdo irodə kədər in bişon, bı səbəb əmə hiç çiyədə bəşmə zərər nı domone. ¹⁰ De Xıdo irodə bıə kədər bə insoni tobə doydə iyən bə xilos vardeydə, əve bımədə pəşimonəti ni. Dınyoədə bıə kədər isə marde hasil kardeydə. ¹¹ Imeha, bıvındən de Xıdo irodə şımə kəşə ın kədəri şımənədə çanədə yolə cəhd, bo bəroət səy orzu, bevəcıyonku norozıyətı, Xıdo tars, həvəs, ğıryət, ədolətpərvərətı hasil kardışe. Şımə nişo doydə ki, bı koədə har cəhətə çanədə pokıyon. ¹² Az həmonə nomə bəşmə nıvışteədə bə nohəxətı kardəkəsi, yaan bə nohəxətı məruz mandəkəsiro nıvıştıme. Pıyeydəme ki, şımə ıştən bıvındənən Xıdo navədə bəmə çanədə bəfomandışon. ¹³ Çımon həmməyku dılvandı səydəmon.

Həmçının Titi şoy-şoy həniyən şo kardışe əməni. Şımə həmməy umu doydə bəy. ¹⁴ Az çəy vədə fəxr kardəmbe deşmə, şımənən xəcolətəjə nı kardıone mını. Çəmə bəşmə votəyon çanədə həğığət bınə, çəmə Titi vədə deşmə fəxr kardeyən rost beşe. ¹⁵ Əv bə yod vardeədə ki, şımə çanədə bəy itoətkorıyon, de kon ehtıromı iyən həyəconı ğəbul kardəyone əv, çəy bəşmə bıə mehıbbət həniyən ziyod beydə. ¹⁶ Az hartərəfə bəşmə uspur beyro şo beydəm.

8

Xəymandə koməq

¹ *Çımı imoniyə boon, bəşmə votey piyeydəmone ki, Xıdo lutfı Makedoniyədə bıə bə imoniyə icmon çanə koməqətı kardışe. ² Əvon de yolə əzyəton dəvinə kardə beədə vey şo bin iyən behəddə kosıbətıədə yolə səxaynətı nişo kardışone. ³ Az şoydim ki, əvon ımı ıştə zu vışkiyə ğəderədə, hətto lap vey, deştəxoşi kardışone. ⁴ Bəmə lovə karde-karde piyəşone bə Xıdo xəlği koməq bı kən bə xəymandə xıdmətı noil bı bun. ⁵ Im çəmə çəş kardeysən ziyodə be, çumçıko əvon ıştəni sıftə bə Rəbbi həsr kardışone, çəyoən de Xıdo irodə bəmə. ⁶ Əve Titiku əjo kardımone ki, ıştə bino kardə ın xəymandə koy şımə arədə bə sə bıjəni. ⁷ İmonədə, sıxanədə, zıneyədə, har curə cəhdədə, bəmə nişo doə bıə mehıbbətədə mıbofi bey ğəzinə bı koədən xəymandətı bı kən.

⁸ Az bəştə səlohiyəti qorə imoni voteydənim, intasi de co kəson kardə cəhdi mığoyisədə şımə mehıbbətı dəvinə kardeyro dılısıxto voteydəm. ⁹ Şımə çəmə Rəbb İsa Məsihi xəymandətı zıneydon. Əv ərbob bıə holədə bəşmə xoto beçiz be ki, şımə Deçəy beçizətı vositə ərbob bı bən. ¹⁰ Bı barədə çımı fikir jıqoye: ım bəşmə xəyri be ki, şımə ponə piyəone ın koy bı kən, həməni iminə icrəkə şımə bıyon. ¹¹ Esət ın koy bə sə bıjənən. De kon orzu bino kardıyone, jəqoən həkəm bı mandən. ¹² Qırəm piyeydəyone, ıştə dasto nıomə ğəderədə ne, ıştə dasto oməy ğəderədə koməqətı bı kən. ¹³ Əmə piyeydənimone şıməni bə əzyət dənəmon, co kəson vəzyətı çok bı kəmon, intasi piyeydəmone bərobərətı bı bu. ¹⁴ Esət bıdə şımə mıbofətı çəvon ehtıyocon bə vırə bırosnı ki, qərək beədə çəvon mıbofətın şımə ehtıyocon bə vırə bərosne. De jıqoy

bıdə bərobərəti bıbu. ¹⁵*Çoknə ki, nıvıştə bıə: «Vey qırdəkəy nıbeşe ziyodəy, kam qırdəkəy nıbeşe nırəsəy».

Tit bə Korinf vıǵandə beydə

¹⁶ Az bə Xıdo şukur kardeydəm ki, Əy noşe bə Titi dili ki, əvən bənə mı bəşmə ğəyd bımandı! ¹⁷ Çumçiko çəmə xahişi ğəbul kardey vəs nıbe bo Titi, əv de yolə həkəməti deştəxoşi omeydə şımə tonə. ¹⁸ Əmə deəy ivirədə qıləyən co imoniyə boə vıǵandeydəmon, əy həmə icmonədə Şoyə Xəbə pevılo kardeyro zıneydən. ¹⁹ Həmçinin im boə Rəbbi şohrətin kardey iyən koməq kardeədə çəmə həkəməti nişo doyro icmon tərəfo səçin kardə bıə ki, bı xəymandə xıdmətədə bəmə həmroəti bıkə. ²⁰ Əmə sərhısob beydəmon ki, de jıqo veyə xəymandə baxşə əloğəyn çəmə kardə xıdmətədə hiçki əməni mızəmmət nıkə. ²¹ Əmə cəhd kardeydəmon ki, əncəx Rəbbi çəşədə ne, insonon çəşədən sərostə koon bıkəmon. ²² Əmə ıştə qıləyən imoniyə boə şımə tonə vıǵandeydəmon, vey koonədə çan kərə bəçəy həkəməti şoyd bıəmon, esət bəşmə uspur beyro əv həniyən həkəme. ²³ Titi barədə isə voteydəm ki, əv çımı xanboze, şımə arədə çımı əməqdoşe, im dıqlə imoniyə boon esə boy bo Məsihi izzətiro çe icmon daynonin. ²⁴ Bı səbəb imoniyon icmon vədə ıştə mehıbbəti bəvon nişo bıkən ki, əmə hədərə vırədə deşmə fəxr nıkardımone.

9

Bə beçizə imoniyon koməq

¹ Bə Xıdo xəlgı kardə bıə koməqi barədə bəşmə bo nıvışte ehtiyoc ni. ² Çumçiko az zıneydəm ki, şımə bo koməqəti karde hozışon. Axayyədə bıə şıməhon ponəku hozı bey barədə az qəp jəme, şıməni Makedoniyəvijon vədə tarif kardıme. Şımə həkəməti bə hərəkət vardışe əvoni. ³ Az imoniyə boon şımə tonə vıǵandeydəm ki, bəşmə asbardə ğaydədə hozı bıbən, bıdə çəmə şımə barədə kardə tarif hədərə benışu. ⁴ Jıqo nıbu ki, kali Makedoniyəvijon demı bon bıvındın, şımə hozı nişon. Bəşmə uspur beyro, nə əmə xəcolətəjə bıbəmon, nəən şımə. ⁵ Əve ki az imoniyə boonku əjo kardıme, əvon çımısə bənav şımə tonə bon, şımə sıftəku vəd kardə mıbofiyə baxşon hozı bıkən. Bıdə in baxşon məcburən ne, deştəxoşi bıbu.

⁶ ıştə yodədə oqətən: kam kaştəkəs kam bədıve, vey kaştəkəs vey bədıve. ⁷ Har kəs bəştə dili niyəti qorə baxşə bıdə. Nıpiye-nıpiye, yaan de məcburiyəti nıdə. Oxo Xıdo de şoy-şoy baxşə doə odəmi piyeydəşe. ⁸ Xıdo ğadire har neməti bəşmə mıbofi bıdə, demiyən jıqo, şımə bo har çokə əməli bol-boli imkon bırası. ⁹*Çoknə ki nıvıştə bıə:

«Paybaxş bəka, bə beçizon baxşə bədo,

Çəy salehəti zol bəmande».

¹⁰*Bə kaştevoni bo tumi iyən hardeyro ruzi doə Xıdo kaşteyro bəşmənen bədo iyən

*8:15 Beşe.16:18

*9:9 Zəb.112:9

*9:10 Yeş.55:10

şımə xəymandəti səməərə heyve bəkarde. ¹¹ Şımə bo hartərəfə səxayn beyro har cəhətə ərbob kardə bıəşon. Bəçəmə de səxaynəti doyro insonon bə Xıdo şukur bəkarden. ¹² Çumçiko şımə kardə in xıdmət əncəx Xıdo xəlgi ehtiyoci doydəni, həmçinin insonon bə Xıdo kardə şukuron ziyodə kardeydə. ¹³ İmoniyon şımə xıdməti vindeydən bə Xıdo şukur kardeydən, çumçiko şımə bə Məsihi Şoyə Xəbə itoət kardeydon, bəvon iyən bə həmməy de səxa paybaxş kardeydon. ¹⁴ Xıdo bəşmə bəxş kardə behəddə lutfi səbəb əvon şımə har qıləyni həsrəti kəşe-kəşe boşmə dıvo kardeydən. ¹⁵ Şukur bıbo bə Xıdo Bəçəy de sıxani vote nıbə ənomi qorə!

10

Paul deştə kardəyon şənbozəti kardeydəni

¹ Az Paul, de Məsihi həliməti iyən mıloyiməti şəxsən şıməku əjo kardeydəm. Şımə arədə odəmon hestin, jıqo voteyden ki, az şımə tonə beədə beciqəm, əmma diyəroədə ciqəynim. ² Esət bəlovəm bəşmə, mını məcbur məkən ki, şımə tonə omeədə de kali odəmon saxt rəftor bıkəm, komon ki, iddo kardeyden əmə bənə cisoniyə insonon jıyeydəmon. ³ Əmə bı dınyoədə bıjıyomonən, bənə cisoniyə insoni mıborizə bardeydenimon. ⁴ Oxo çəmə canqi avjoron cisoni nin, əvon istehkomon rıjniye zınə bə Xıdo ǵıvvə malikin. Əmə deyəvon beəsosə dəlilon rədd kardeydəmon. ⁵ Xıdo barədə bə zınəy vəynə beşə har curə fikron məhv kardeydəmon, əvoni bə Məsihi itoət kardeyro əsir kardeydəmon. ⁶ Şımə bə Məsihi mıkəmmələ itoət kardeədə əmə har curə beitoətəti bə rostə ro obəkırnemon.

⁷ Şımə tətımə diyə kardeydəşon. Ki loğəti kardeydə ki, bə Məsihi aide, bıdə əv bızını ki, əmənen bənə bəy bə Məsihi aidimon. ⁸ Ğasbu de Rəbbi doə səlohiyəti tikəy vey şənbozəti kardeydəm, bı səbəb xəcolət kəşeydənim. Rəbbi boçəmə imoni məhv kardeyro ne, inkişof doyro in səlohiyəti doəşe bəmə. ⁹ Bıdə hiçki jıqo fikir nıkə ki, deştə nomon şıməni torsıneydəm. ¹⁰ Çımı barədə kali kəson voteyden, «çəy nıvıştə nomon ciddi iyən ǵudrətinin, çəmə arədə beədə isə bezəhm, çəy nıtgən beəhəmiyəte». ¹¹ Ki jıqo şıneydəbu, bıdə bızını ki, ıştə nomonədə çı curəmonsə, şımə tonə beədə ıştə koədən jəqo bəbemon.

¹² Əmə piyeydəmonni ıştən-bəştə zəmonət doə odəmon ǵəzinə bıbəmon, yaan ıştəni deyəvon mıǵoyisə bıkəmon. Əvon ıştəni deştə vıjə pamyeyədə iyən mıǵoyisə kardeyədə beaǵıləti kardeyden. ¹³ Əmə isə behəd şənbozəti nıbəkamon, əncəx Xıdo bəmə mıəyən kardə hıdudədə boşməno şənbozəti bəkamon, şımənen bımi daxiliyon. ¹⁴ Əmə ıştə hıdudonku bə kəno beşeydənimon, oxo Məsihi Şoyə Xəbə bəşmə sıftə rosniyəkəs əmənimon. ¹⁵ De co kəson zəhməti behəd şənbozəti kardeydenimon. Umudəvomon ki, şımə imon ziyodə be-be şımə arədə çəmə fəoliyətən ziyodə bəbe. ¹⁶ Bəvədə əmə həniyən bə co məholon şe bəzınemon iyən Məsihi Şoyə Xəbə bəyon bəkamon, de co kəson fəoliyəti şənbozəti nıbəkamon. ¹⁷ *«Şənbozəti kardəkəs, de Rəbbi şənbozəti bıkə». ¹⁸ Çumçiko ıştə barədə zəmonət doəkəs ne, Rəbbi çəy barədə

zəmonət doəkəs loyiğ zınə beydə.

11

Paul iyən duyəvojdə həvariyon

¹ Kaş ki, şımə bəçımı kamişə beağıləti petovə bəbeşon. Bəle, kamişəyən petovən bəmi. ² Az boşməno ilahi qıləy rıvınəti hiss kardeydəm. Jıqo bızın şıməni ənəbuəstə kinə gəzinə bə qıləy Zoə hoştəme, yəni bə Məsihi. ³ *Əmma tarseydəm ki, mori deştə hiləqorəti Həvo bə dast dəğənde gəzinə, şımə ağılən ıştəni bə Məsihi gısdəğə iyən pokə roy həsr kardeyku dəqijiyı. ⁴ Şayət kiysə şımə tonə bo, çəmə bəşmə vəz kərdə İsa ne, co qıləy xıloskəri vəz biko iyən şımə co qıləy fərginə ruf bıstənon, yaan co qıləy fərginə Şoyə Xəbə gəbul bikon, de məmnuyəti bimi petoveydəşon. ⁵ Jıqo şıneydəm ki, az çı «nom-sandinə həvariyon» sə hiç çiyədə bə dumo mandeydənim. ⁶ Çımı natiqəti məhorət nıboən, zıneyədə bəməhorət nim. İmi har vəzyətədə hartərəfə bəşmə nişo kardımone.

⁷ Qıno kardıme bəqəm şıməni barz kardeyro ıştəni bə ji qəte-qəte Xıdo Şoyə Xəbə mıftə pevilo kardıme bəşmə? ⁸ Az bəşmə xıdmət kardeyro co imoniyə icmonku komijdi səme kisibkorəti kardıme. ⁹ *Şımə tonə beədə çımı ehtiyoc be-be bəşmə hiç qıləyni şələ nıbim. Çumçıko Makedoniyəo omə imoniyə boon çımı həmə ehtiyoci doşone. Bəşmə şələ beyku ıştəni oqətıme iyən oməvədən obəqətem. ¹⁰ Bə Məsihi həğigəti molik be-be vote bəzınem ki, Axayyə viloyətədə hiçki mını demi şənbozəti kardeyku məhrum kərdə əzini. ¹¹ Gəsbu şımə şıneydon ki, bəşmə şələ nıbeyro şıməni piyeydəmni? Xıdo zıneydə ki, şıməni piyeydəme.

¹² Az ıştə kardəy ijən bəkam ki, ıştəni deyəmə bərobər qəteyro əsos nəvə bə şənbozəti kardəkəson firsənd nıdəm. ¹³ Çumçıko ə odəmon duyəvojdə həvarin, ıştəni bə Məsihi həvari cild dənəoə hiləqoronin. ¹⁴ Bimi çöçin bey lozim ni, çumçıko Şəytonən ıştəni bə nur mələki cild dənəoydə. ¹⁵ Şəytoni xıdmətkoron ıştəni bə salehəti xıdmətkoron cild dənəoy çöçin ni. Çəvon aqibət bəçəvon əməlon qorə bəbe.

Paul deştə kəşə əzyəton fəxr kardeydə

¹⁶ İjən voteydəm, bıdə hiçki mını beağıl nızını. Jıqo beəsə, mını beağılı gəzinə gəbul bıkən, bıdə azən kamişəy şənbozəti bıkəm. ¹⁷ Çımı esət votəyon Rəbbi votəyon nin, şənbozəti kərdə-kərdə boştə şəhn kərdə beağılə odəmi sıxanonin. ¹⁸ Madəm ki, vey kəson de dınyoviyə koon şənbozəti kardeydən, azən şənbozəti bəkardem. ¹⁹ Şımə de şoy-şoy bə beağılən petoveydəşon, oxo şımə vey ağılmandışon. ²⁰ Şımə bə odəmon petoveydəşon ki, əvon şıməni gıl kardeydən, istismor kardeydən, şıməku foydə peqəteydən, ıştəni pekırneydən, bəşmə dimi sillı jəydən. ²¹ Xəcolət bıkəşomən gəbul kardeydəm ki, çəmə bimi zu vışkiyeydəni! Ki ciqə kardeydə de çičiyəsə şənbozəti bıkə, qıləy beağılı gəzinə voteydəm ki, azən ciqə kardeydəm. ²² Əvon İbranin? Azən

*11:3 Ofə.3:1-13

*11:9 Fil.4:15-18

İbranim. Əvon İsrailjonin? Azən İsrailjim. Əvon İbrahimi nəsilən? Azən İbrahimi nəsilom. ²³*Əvon Məsihi xıdmətəvononin? Bənə beağılı voteydəm ki, Çəy həniyən yolə xıdmətəvon azim, çumçiko çımı zəhmət həniyən veye, həmməysə vey bə zindon dəğandə bım, həmməysə vey mini kuyəşone, çan kərə de mardey dimbədim oməm. ²⁴*Yəhudiyon penc kərə sivi nəv ğırmoc jəşone bəmi, ²⁵*se kərə de ləvo mini kuyəşone, i kərə mini sığbəse kardışone, se kərə bə qəmi ğəzo eqınim iyən i ruj şəv-ruj dıyo nığılıədə mandim. ²⁶*Rə-rə səyohətədə beədə ruyonədə bə təhlukə qıriftor bim, ğulduronku təhlukə, həmtobyəku təhlukə, bıtpərəstonku təhlukə, şəhrədə təhlukə, daştədə təhlukə, dıyoədə təhlukə, duyəvoje imoniyonku təhlukə. ²⁷Detobə qiri qıniye zəhmət kəşəme, çan kərə ənəhit mandim. Vəşi iyən təşi mandim, vey vaxti hardemon iyən sardədə olət pəydo nıkarđime. ²⁸Ğərəyz bimon har ruj bo imoniyon icmon həmməy kəşə ğəyğū qoni çımı qiədəye. ²⁹Kiyə zəif beədə azən zəif nıbim bəqəm? Kiyə dəqıjyədə az əzobiku suteydənim bəqəm?

³⁰Ehanə şənbozəti bıkom, deştə zəifətiyon şənbozəti bəkam. ³¹Rəbb İsa iyən Çəy Pıə Xıdo zıneydə ki, az du voteydənim. Bıdə Bəy zoləti şukur bıbu! ³²*Dəməşğədə podşo Areta vali bə hıvosəkon əmr doşe ki, mini qəteyro şəhri nəzorətədə oqətin. ³³Əmma az səvəxi dılədə şəhri divo pencəku evardə bim iyən çəy dasto vitim.

12

Pauli çiyemonon iyən vəhyon

¹Az şənbozəti bəkam, çımı nıbuşəən foydə. Esət Rəbbiku omə bə çiyemonon iyən vəhyon ovaşteydəm. ²Zıneydəm ki, bə Məsihi imon vardə qıləy odəm^b çordə sor çımı bənəv, zıneydənim cismən, yaan ruhən, əncəx Xıdo zıneydə, bə osmoni seminə ğat bardə be. ³Zıneydənim im odəm cismən, yaan ruhən, Xıdo zıneydə ⁴bə behişt bardə be. Əyo məsəşe de zıvoni vote nıbə, bə insoni qəp jəy ğədəğən kardə bıə sıxanon. ⁵De jıqo, odəmi şənbozəti bəkam, əmma ıştə barədə de hiç çiy şənbozəti nıbəkam, ğərəyz zəifəti. ⁶Şənbozəti bıkomən jıqo, beağıl nıbəbem. Çumçiko həğığəti bəvotem. Əmma az imi nıbəkam, bıdə hiçki mini ğərəyz ıştə vindəy iyən məseyse ziyodə qıləy şəxs nızni.

⁷Deştə sə vəhyon barziyəti ğuddə nıkardeyro bəçımı andomi əzob doə qıləy teğ, yəni Şəytoni qıləy daynə vığandə be ki, az ğuddə nıkəm. ⁸Se kərə bə Rəbbi lovə kardime ki, imi peqət çımıku. ⁹Əmma Əy votışe bəmi: «Çımı lutf bəti vəse, çumçiko Çımı ğıvvə ıştı zəifətiədə mıkəmməl beydə». Əve ki az deştə zəifətiyon şo be-be həmməysə vey şənbozəti bəkam ki, Məsihi ğıvvə bəminədə səbəso bıbu. ¹⁰Bə səbəb

* **11:23** Həv.16:23

* **11:24** Ğanun.25:3

* **11:25** Həv.14:19; 16:22

* **11:26** Həv.9:23; 14:5

* **11:32-33** Həv.9:23-25

^b**12:2** *Qıləy odəm* – yəğın ki Paul ıştə barədə voteydə.

az bə Məsihi xoto bə zəifətiyon, təhğiron, ehtiyocən, təğibon iyən mısibəton rozim, çumçiko az zəif beədə ğıvvə səydəm.

¹¹ Az beağıl bim, oxo şımə mını vadar kardıyone. Şımə çımı barədə zəmonət doəninbişon. Çumçiko iştən jıçiy nıbomən, çə həmonə «nom-sandinə həvariyoñsə» bə dumo mandeydənim. ¹² Çımı həvari bey nışonon şımə arədə de yolə durumi, əloməton, mecuzon iyən ğıvyon nişo doəbe. ¹³ De co imoniyə icmon mığoyisədə çı nohəxəti kardıme bəşmə? Ğərəyz bimi ki, az bəşmə şələ nıbim. Bıbaxşən çımı in noxsani!

Pauli ğəyğü

¹⁴ Imeha, az hozım ki, seminə kərə şımə tonə bom. Bəşmə şələ nıbəbem, çumçiko şıməku hiçiy piyeydəmni, əncəx şıməni piyeydəme. Oxo fərzəndon bo pıə-moə ne, pıə-moə bo fərzəndon ğəzənc kardeydə. ¹⁵ Azən şımə rujqori roədə iştə har çiy iyən iştə coniyən de şoy-şoy bədom. Şıməni lap vey bıpiyome, şımə mını kam bəpiyone bəqəm? ¹⁶ Bıdə jıqo bıbu, şımə jıqo şıneydon ki, az qonə şələ nıbim bəşmə, əmma veyəzın beyro hilə oməym, şıməni bə dast dəğandıme. ¹⁷ Şımə tonə vığandə bıə odəmonədə de kom qıləyni vositə şıməku çıçsə peqətıme boştə? ¹⁸ Titiku əjo kardıme ki, şımə tonə bo iyən qıləy imoniyə boən deəy vığandıme. Titi kisib kardışe şıməni bəqəm? Əmə eyni rufədə rəftor nıkardımone bəqəm? De eyni rizi nışimon bəqəm?

¹⁹ Esət yəğın şımə şıneydəşon ki, əmə iştəni şımə vədə mıdofıə kardeydəmon? Bə Məsihi məxsus bıəkəsi ğəzinə Xıdo vədə qəp jəydəmon. Azizqiromiyon, çəmə kardə har çiy boşmə inkişofıroye. ²⁰ Tarseydəm ki, az omeədə şıməni iştə piyəy ğəzinə nıvındım, şımənən iştə piyəy bəmıku nıvındən iyən mınocişə, rıvınəti, ğəzəb, rəğobət, bıhton, ğır-bır, loğəti, hərkihərkiyəti bıvındım. ²¹ Imən mını torsıneydə ki, şımə tonə omeədə çımı Xıdo bəşmə qorə mını şımə vədə bə ji bəqəte: bəvədə bo ə odəmon yas bəqətem ki, iştə navko kardə qıno mırdolətiku, cinsiyə dəqardətiku iyən beəxloğətiku imtino kardəşonni.

13

Pauli məslohaton iyən səlomon

¹ *Im çımı seminə omemon bəbe şımə tonə. «Har iddio dı, yaan seqlə şoydi tərəfo təsdiğ kardə bıbu». ² Az dıminə kərə şımə tonə beədə çəşnavi kardəmbe bə navko qıno kardəkəson, esət diyəroədə tikrorən çəşnavi kardeydəm bəvon, komon ki, qıno kardeydə dəvom kardeydən, həmçinin bə əmandəyonən çəşnavi kardeydəm ki, az omeədə çəvon hiç qıləyni becəzo onıbəqətem. ³ Şımə piyeydone sıbut bıvındən ki, Məsih deçımı vositə qəp jəydə? Məsih şımə arədə de zəifəti ne, de ğudrəti fəoliyəti nişo doydə. ⁴ Həğığətən Əv zəifəti dilədə bə çomex kəşə be, de Xıdo ğudrəti jiyeydə. Əmənən Deəy bə ivırə zəifimon, əmma boşmə xəyro Deəy bərobər de Xıdo ğudrəti bəjijeymon.

⁵ İştəni osə bıkən iyən dəvinə bıkən şımə imoni roədə ğoymişon, ya ne.

*13:1 Ğanun.17:6; 19:15

Sərəseydənişon ki, İsa Məsih şımənədəye? Nekneki dəvinəo de zəfəri beşe əzinişon.
⁶ Umudəvom şımə səbərəseşon ki, əmə dəvinəo de zəfəri beşəmon. ⁷ Bə Xıdo dıvo kardəmon ki, bevəcə ko məkən. Bə səbəb ne ki, ıştəni dəvinəo de zəfəri beşəkəson ğəzinə nişo bıdəmon, bə səbəb ki, şımə de həğiğəti hərəkət bıkən, hətto əmə dəvinəo benişəkəson ğəzinə bıbomonən. ⁸ Çumçıko əmə bə həğiğəti vəynə hiçiy karde əzınimon, çiç bıkomon həğiğəti roədə kardeydəmon. ⁹ Əmə zəif, şımə isə zumand beədə şo beydəmon. Imha, boşmə islo beyro dıvo kardeydəmon. ¹⁰ Bə səbəb imoni diyəroyo bəşmə nıvıştəydəm ki, şımə tonə beədə deşmə saxt rəftor nıkəm. Oxo Rəbbi bəmı rıjniyero ne, soxteyro səlohiyət doəşe.

¹¹ Mılxəs, ha çımı imoniyə boon, səğ bıbən. İslə bıbən, dılvandi pəydo bıkən, həmfikir bıbən, sulhi dılədə jimon bıkən. Mehıbbəti iyən sulhi səvon bıə Xıdo deşmə bəbe. ¹² Bıdə Xıdo xəlğ bə iyəndı səlom bıdə. İyo bıə Xıdo xəlği həmməy boşmə səlom vığandəydə. ¹³ Rəbb İsa Məsihi lutf, Xıdo mehıbbət iyən Mığəddəsə Rufi unsiyət de həmməy bıbu!